

Spiranza

Tri stiddi 'nta 'na notti d'austu
caderu all'improvvisu di lu celu:
dui fineru 'nta li to' occhi di sirena
p'illuminarimi la via 'm mezz'a li scogghi
e una si 'nzirrau, a lu drittu, 'nna lu cori.
Comu palumma chista avi l'ali
cu' pinni fatti di lacrimi e sorrisi
e comu l'arcubalenu sta 'mpintu
'nta lu celu, tra pioggia e suli,
accussì idda nun vola, mai si sperdi,
qualunqui cosa succeri 'nta la vita,
mai si nni va luntanu, distanti.
Cci haju datu un nomu a carattiri d'oru
'nna la menti, quarchi vota cunfusa,
l'haju chiamata, cu' affettu, spiranza,
lu pani, la ricchizza di li mischineddi.

Sulu allura

Lu suppliziu di l'agunia
vocanzita estenuanti
di mumenti sempri amari
di jorna uri minuti
attimi di nenti.

Sulu allura forsi ricurdamu
d'ammazzari lu dragu
chi crudeli sta di guardia
a la porta di lu cori.

Sulu allura forsi ricurdamu
chi semu fangu
'mpastati di fangu.

Sulu allura forsi ricurdamu
chi la vita è sulu un sonnu
'nta la strata di la morti.

'Un è ummira di nuvula

Haiu 'nta l'aricchi risunanza distanti
chi portanu a lu cori
lu rutuliu d'un carrettu,
lu scrusciu di cianciani,
lu cantu nenuisu
e la frischiatu di picuraru
ch'a la mannara riporta li so' armali
e 'nta ll'occhi,
l'argentu di l'alivi 'nturciuniati,
lu pruvulazzu di spichi, pagghia e ciusca
'nta ll'aria
quannu si pisava cu' la vestia,
chiamannu li santi
p'aviri bon ventu e friscura.
Chissi li me' rarichi funnuti,
lu me' sintimentu
ch'un è ummira di nuvula
chi veloci passa
supra un gibbiuni d'acqua
p'oscurari la vita d'ogni jornu.

Un vicchiareddu

C'è un vicchiareddu a lu San Giuvanni
chi viu a la villa e sunnu tant'anni,
s'assetta sempri 'nta lu stessu sedili,
pari 'na varca ch'un avi cchiu' vili.

Mi pari stancu, ogni tantu siddiatu
specii s'a lu suli nun s'ha quariatu;
l'occhi a banedda, quarchi sbarigghiu
quannu 'un si parla o 'un c'è cunsigghiu.

Lu sguardu persu, luntanu talia
dunni cunzenti la forti miopia,
ma cu' li ricordi lu so' cori galoppa
a quannu lu ventu avia a la poppa.

Ripenza a quannu turnannu d'a guerra,
p'aviri panuzzu zappava la terra.
Viremma ricorda 'dda prima vasata
ch'a Rosa scippau, la so' 'nnammurata.

Sonna oramai e chi po' cchiu' fari?
quannu la vita cci ia a jurnari.
Chianci, ogni tantu, lu figghiu mortu
chi mancu lu tempu cci detti cunortu.

Spunta 'na lacrima 'nta l'occhi macari
e 'un è p'allammicu o picca manciari;
subbitu cu' la manu si la scafunia
e scaccia accussi' 'dda malincunia.

Sunnu li sei, lu tempu è canciatu
e 'n autru jornu è puru passatu;

lassa lu sedili cchiu' immurutu,
scruscinu l'ossa, è un pocu allascutu.

Rosa, la muggheri è puru idda stanca
a destra s'assetta e Pippinu a manca,
mancianu anticchia di pasticedda,
un ovu vugghiutu cu' la qualedda.

S'assetta allura a la televisioni
Rosa sparecchia, 'un cci fa 'mpressioni.
Ancora av'a finiri lu chicchirinu
pi' la cuperta a dutari, di veru linu.

Doppu mezzura già Peppi capuzzia:
pinzioni, guerri, scioperi: chi camurria!
Sempri di chissu a lu telegiornali,
si parla ogni jornu a tutti li canali.

Si susi, narvulia, va a lu gabinettu,
arriva a lu lettu e cerca risettu.
Si rummulia, si duna 'na grattata,
si gira di latu, fa 'na sbarigghiata.

Si fa la Crucì, cci cala lu sonnu
e penza a li figghi chi turnari 'un ponnu:
hannu la famiglia e huntanu stannu,
chisa' si m'attrovanu a Natali, chist'annu.

Si chiuri l'occhi pi' cchiu' 'un cci pinzari
e quasi pi' cunfortu si metti a runfuliari.
Si sonna di turnari quann'era picciuttetdu
ch'anchi s'avìa pitittu, cci paria tuttu beddu.

L'amicu ciecu

Haiu 'n amicu chi mi sta luntanu.
È beddu di facci, generusu di cori,
profunnu quant'è profunnu mari,
allegru quant'è allegra l'aria
'nt'on jornu tepidu di suli.
Amanti d'ogni cosa, di la vita;
gioia riluci 'nta so' facci,
ma no 'nta l'occhi
chi tratteni chiusi, astutati.
Iddu 'un cci viri di la nascita,
'un ha mai vistu celu, stiddi,
mari, ciuri, lu visu di la matri.
Ogni tantu, quannu nni 'ncuntramu,
mi dici: "Quant'havi ch'un nni viremu?"
Parinu assurdi 'sti palori,
ma puru si l'occhi havi morti,
iddu mi viri cu' li manu,
cu' la menti, cu' so' cori.
Perciò 'un chianciu
pi' la pena chi mi veni,
mi cunortu.
Tristizza sulu mi fa, quarchi vota,
quannu c'è fudda, cunfusioni.
Allura si nni sta canziatu,
'nta un angulu, cu' 'n amicu fidatu:
hav'aspittari a tutti
chi trasinu, nescinu
o s'annacanu, indifferenti:
lu so' turnu veni sempri all'urtimu.

Ei, na picciotta ancora nica,
 un sappi mancu
 li usci di la vita.
 Ei un bocciolu
 a la prima acquazzina,
 ha rosa appena sbucicata.
 Lu mai complice latru
 t'arrubbaun.
 Diu, Sigrunti,
 picchi nni fa', nasciti
 si poi nni fa', morti
 accussi piccilliiddi?
 Penzu
 e lu dubbiu è amaru assai,
 o si' sulu un nomu
 chi vola cu' u ventu
 supra i nuvoli.
 Diu, Sigrunti,
 chi regnì l'unièghie,
 tu puth autrala.
 Ora si vo', fatti.
 Portala supra un'isola,
 l'unitana e flicci,
 'nta 'n'atura dimensioni:
 portala ntu paraddisu
 di li picciutteddri.

a Valentine

Pi', na creatura arrubbatu

Da cani a omu

Sugnu nicareddu e mi chiamu Fofo',
haiu curtu lu pilu di culuri marro':
si, sugnu un cani veramenti sci' sci',
'un sugnu bastardu picch'haiu pedigri'.

Soccu veni a diri capisci vagamenti,
forsi li pila ch'a ciuffu allegramenti
s'annacanu spavaldi supra la me' tistuzza,
quannu pumpusa cu' l'aria idda truzza.

Cu' sciampi odurusi sugnu spissu lavatu
e pi' supraccucciu sugnu assai profumatu,
mi chiamanu viremma "cani di salottu",
ma iu 'n campagna pigghiassi un ternu a lottu.

P'amicu haiu un pasturi tedescu
ch'un parla 'talianu, ma sulu cagnescu:
iddu è un giganti, è furzusu qualmenti,
di nuddu si scanta e abbaia malamenti.

Puru la guardia fazzu a lu me' territoriu,
cu' mia c'è macellu 'un c'è veru mortoriu.
Dicinu tutti ch'un sugnu di caccia
e 'nveci assicatu ogni 'attazzu ch'affaccia.

Puru riportu ogni oggettlu lanciatu
picchi' di piccolinu iu l'appi 'nzignatu.
Haiu bboni muccuna, sugnu quasi viziatusu,
di la me' patruna sugnu 'nzinu aduratu.

E puru 'na vota di casa scappavu
e canti e curtigghia, ohimè, frequentavu;

attraversu la strata e un'autu sfrecciava
chi scantu chi appi e di 'n capu mi cacava.

La fami fu tinta, mi canciauv d'aspettu,
ma cunortu truvavu 'nto 'n cassonettu.
L'omu cci metti, dici, li so' rifiuti,
la chiama munnizza, chi Ddui l'aiut!

Iu m'attruvavi pero' talmenti bbeni,
e lu cuntu cuntenti a cu veni veni,
chi' li delizzii chi dda scaliavi
foru preziusi e assai mi scialavi.

Lu me' mantellu canciau di culuri,
tinciutu com'era di milli sozzuri,
ma fu 'a prima vota chi cani mi 'ntisi
e quannu turnari a la casa decisi,

fieru lu fici e 'ngrasciati com'era
mi presentai sfrontatu, cu' 'a cura 'a bannera.
"Un si' cchiu' di razza", mi dissi 'a patruna
"Schifu mi fai", ma acchianavu 'i scaluna.

Fui quasi afflittu, ma 'un m'offisi pi' nenti
e li festi cci fici tutt'allegru e cuntenti:
era la me' signura, era la me' patruna
e nun m'interessava s'era biunna o bruna,

s'era auta o vascia, s'era tinta o bbona,
di chi razza era, siddu canta o sona.
Dittu tra nui 'un m'importava nenti,
'un sugnu comu l'omu ch'esti un gran fetenti,

chi ama lu so' prossimu, a secunnu lu culuri
e a chiddu ch'è diversu cci duna assai duluri,
chi fa lu preju a unu chi è di lu so' rangu
e a tutti li dissimili jittassi 'nna lu fangu.